

女科經綸

清 楊李 蕭 璣 廣六纂著

卷七

崩帶門

經論血崩屬悲哀陽氣內動。
素問曰。悲哀太甚。則胞絡絕。胞絡絕則陽氣內動。發爲心下崩。數溲血。

經論血崩屬悲哀熱氣在中

素問曰。悲哀太過。則心系急。肺布葉舉。而上焦不通。熱氣在中。故血走而崩也。

經論血崩屬陰虛陽搏

素問曰。陰虛陽搏謂之崩。

經論血溢屬勞力傷腸胃絡脈

靈樞曰。猝然飲食。則腸滿。起居不節。用力過度。則絡脈傷。陰絡傷則血內溢。血內溢則後血。腸胃之絡傷。則血溢於外。

慎齋按。已上經論三條。序婦人血崩之屬內傷爲病也。血崩有得之悲哀者。此七情傷心之崩也。有得之勞力者。此內傷勞倦之崩也。

經論血崩屬於熱

運氣曰。少陰司天。熱淫所勝。民病血泄。少陽在泉。火淫所勝。民病便血。歲金不及。炎火乃行。民病下血。

綱目曰。是火炎助心。血盛而血下也。

經論血崩屬於寒

運氣曰。太陰司天。寒淫所勝。血變於中。民病血泄。太陽之勝。血脈凝泣。感爲血泄。陽明司天之氣。民病便血。治以諸熱。

綱目曰。是寒攻心。血虛而下血也。

經論血崩屬於風

運氣曰。少陽司天之政。初之氣。風勝乃搖。候乃大溫。民病血崩。

慎齋按。已上經論三條。序婦人血崩之屬。火熱風寒。外感爲病也。血崩固屬內傷不足證。而火熱風寒客邪之感。亦間有之。但血崩爲婦人前陰病。屬於內因。運氣血泄便血。是言大腸下血。屬於外因。綱目列之血崩證內。則誤矣。序書之訛。在於全善且然。而況下此乎。故存以俟正之。

金匱論血崩屬三焦絕經

張仲景曰。寸口脈微而緩。微者衛氣疎。疎則其膚空。緩者胃弱不實。則穀消而水化。穀入於胃。脈道乃行。水入於經。其血乃成。榮盛則其膚必疎。三焦絕經。名曰血崩。

金匱論崩漏屬虛寒相搏

張仲景曰。寸口脈弦而大。弦則爲減。大則爲芤。減則爲寒。芤則爲虛。虛寒相搏。此名曰革。婦人則半產漏下。

慎齋按。已上金匱二條。序婦人崩漏本於三焦絕經。而芤減之脈。爲虛寒相搏之病也。

崩漏屬敗血膿積

王海藏曰。或因胎產。或因酒色。前後脫血。帶漏不已。先由子臟。俱入赤腸。滓液惡穢。前行太過。滓糞燥結。後滯不通。此胎腸俱病。治宜推去敗血膿積。益血致新也。心所不生。脾所不裹。肝所不藏。此三焦經絕也。宿雖爲病。亦有淺深新久。治亦從輕重之。

血崩有瘀屬惡血未盡

戴原禮曰。血大至曰崩。或清或濁。或純下瘀血。勢不可止。有崩甚腹痛。人多疑惡血未盡。又見血色瘀黑。愈信惡血之說。不敢止截。大凡血之爲患。欲出未出之際。停在腹中。卽成瘀血。以瘀爲惡。又焉知瘀之不爲虛冷乎。瘀而腹痛。血行則痛止。崩而腹痛。血住則痛止。芎歸湯加薑附。止其血而痛自止。

血崩屬涎鬱胸膈

朱丹溪曰。有涎鬱胸中。清氣不升。故經脈壅遏而降下。非開涎不足以行氣。非氣升則血不能歸隧道。此論血泄之義甚明。蓋以開胸膈間之濁涎。則清氣升。清氣升。則血歸隧道而不崩矣。其證或腹滿如孕。或臍腹疔痛。或血結成片。或血出則快止則悶。或臍上動治宜開結痰行滯氣消汚血。

慎齋按。已上三條。序血崩之屬。汚血痰涎。實邪爲病也。凡病先明虛實寒熱。如崩漏證。有虛有實。有寒有熱。虛者主於血虛氣虛。陰虛陽虛。實者主於汚瘀惡血痰涎鬱滯。虛則爲寒爲冷。實則爲火爲熱。此證之不可不先辨者也。

崩漏屬衝任血虛不能約制

聖濟總錄曰。婦人崩漏病。經血淋瀝不斷是也。衝任之脈。所至有時。若非時而下。猶器之津洩。故名曰漏下。蓋由血虛氣衰。不能約制。又有瘀血在內。因冷熱不調。使血敗。其色或赤如豆汁。黃如爛瓜。黑如衃。青如藍。血如膿。五色隨五臟虛損而漏應焉。

崩下屬衝任氣虛不能制

朱丹溪曰。崩下由臟腑傷損。衝任二脈血氣俱虛故也。二脈爲經脈之海。血氣之行。外循經絡。內榮臟腑。若勞傷過極。衝任氣虛。不能約制經血。故忽然而下。謂之崩中暴下。治當大補氣血。升舉脾胃之氣。微加鎮墜心火之藥。以治心。補陰瀉陽。而崩自止。東垣有治法。但不言熱。其主在寒。學者宜細思之。

血崩屬陽虛不足

趙養葵曰。血崩之疾。當分陰陽而治。氣血人身之陰陽也。陽主升。陰主降。陽根陰。陰根陽。一升一降。循經而行。無崩漏也。若陽有餘。則升者勝。血出上竅。陽不足。則降者勝。血出下竅。總之血隨陽氣而升降。陽氣者風也。風能上升。然必須東方之溫風。始能升。故用助風益氣湯。凡氣虛不能攝血而崩者。其人必面白。尺脈虛大。食飲無味。久病者有之。

慎齋按。已上三條。序血崩之屬。血虛氣虛。陽虛不足也。血崩本爲血病。而有陽氣之虛者。血脫氣亦脫也。陰陽相維。互爲其根。陰血大下。陽不能維。固當以無形之氣。生有形之血也。

血崩屬熱爲陽脈有餘病

張子和曰。婦人天癸盡。本不當下血。血得熱而流散。非寒也。女子血崩。多因大悲哭甚。則肺葉布。心系爲之急。血不禁而下崩。經曰。陰虛陽搏。謂之崩。陰脈不足。陽脈有餘。數則內崩。血下流。世有以虛損治之。莫有知其非者。可服大劑黃連解毒湯。

血崩屬陽乘於陰爲陽邪有餘病

許學士曰。崩中多用止血及補血藥。不效。以霹靂酒治之。此陽乘於陰。所謂天暑地熱。經水沸溢是也。經云。陰虛者尺脈虛浮。陽搏者寸脈弦急也。是爲陰血不足。陽邪有餘。故爲失血內崩證。用奇效四物。加膠艾。再入黃芩。醫曰。心主血。血得熱則行。得寒則止。故漏下屬熱兼虛者。四物加黃連。凡婦人感熱。血脈妄行。病曰熱崩。以抑氣散。倍加生地。

血崩屬熱不可作寒論

王海藏曰。婦人血崩。來如潮湧。明是熱勢妄行。豈可作寒論。治宜清補。兼升提。不可驟止。

經血暴崩屬火熱爲喜怒驚恐所致

張子和曰。婦人經血。終於七七之數。數外暴下。經曰。火主暴速。亦因暴喜暴怒。憂急驚恐所致。然也。慎不可作冷病治之。用峻熱之藥。則死。可用黃連解毒湯。以清於上。更用蓮房殼灰。棕灰。以滲於下。後用四物加胡索散涼血和經之藥。

血崩屬陰虛火逼妄行。關心腎二經

馬玄臺曰。經云。陰虛陽搏。謂之崩。蓋尺脈既虛。虛則血已損。寸脈搏擊。虛火愈熾。

謂之曰崩。由火逼而妄行也。婦人血崩。是從胞絡宮來。血久下行。已爲熟徑。則本宮血乏。十二經之血皆從此滲漏矣。然胞絡下繫於腎。上通於心。故此證實關心腎二經。宜有陰虛陽搏之脈也。東垣用十二經引經之藥。使血歸十二經。然後用黑藥止之。若徒用黑藥。不先服領血歸經藥。病亦難愈也。

血崩屬真陰虛不能鎮守包絡相火

張潔古曰。崩者。倏然暴下也。漏者。淋瀝不斷也。將息失宜。勞役過度。喜怒不常。大傷於肝。肝爲血府。傷則不藏血。而爲崩中漏下。或悲思憂恐太甚。陽氣內動。真陰虛。不能鎮守包絡相火。故血走而崩。宜養血安神爲主。或因脾胃氣虛下陷。腎與相火相合。濕熱下迫而致。宜調脾養血爲主。或大小新產。遽觸房事。皆作崩漏。或經水未絕。慾熾而傷血海。亦致崩漏。皆宜養血鎮守爲上。

崩漏屬脾胃虛火乘心包

李東垣曰。女子漏下惡血。或暴崩不止。多下水漿之物。皆由飲食不節。或勞傷形體。或心氣不足。致令心火乘脾。脾土受邪。夫脾土。滋榮周身者也。心生血。血主脈。二者受邪。病皆在脈。脈血之府也。心脈之神也。心不主令。包絡代之。心系者。包絡

命門之脈也。主月事生孕。因脾胃虛而心包乘之。故漏下血水不止。當除濕去熱。用升陽除濕湯。此藥乃從權衡之法。以風藥勝濕。爲胃氣下陷而迫於下。以救其血之暴崩也。若病愈。經血惡物已盡。主病雖除。後必須以黃耆人參甘草當歸之類。數服以補之。若經血惡物下之不絕。尤宜救根本。當益脾胃。退心火之亢甚。是治其根蒂也。

崩漏屬心火亢甚肝實不納血

虞天民曰。婦人崩漏不止。先因心火亢甚。於是血脈泛溢。以致肝實而不納血。出納之道遂廢。經曰。子能令母實。是肝腎之相火。挾心火之勢。從而相扇。所以月水錯經妄行。無時而泛溢也。若不早治。漸而崩中。甚則爲血枯發熱勞極證。不可治矣。

慎齋按。已上八條。序崩漏之屬火熱爲病也。血崩漏下。內經運氣均主於火。然火亦有虛實之分。惟子和學士海藏三家。則以陽邪有餘立論。故有不可作寒冷治法之說。至潔古東垣雖言包絡相火。心火乘脾。而曰真陰虛。曰脾胃虛。則又不可純以火熱爲治矣。玄臺天民亦從張李以發明其未盡。臨是證者。毋竟

從火治。必兼潔古東垣之論。爲不易也。

血崩屬寒在下焦

陳良甫曰。婦人衝任二脈。爲經脈之海。外循經絡。內榮臟腑。若陰陽和平。則經下依時。如勞傷不能約制。忽然暴下。甚則昏悶。若寸脈微遲。爲寒在上焦。則吐血衄血。尺脈微遲。爲寒在下焦。則崩血便血。法當調補脾胃爲主。

崩漏日久化寒主升舉論

李東垣曰。聖人治病。必本四時升降浮沉之理。經漏不止。是前陰之氣血已下脫。水瀉不止。是後陰之氣血又下陷。後陰者。主有形之物。前陰者。精氣之門戶。前後二陰俱下。是病人周身之氣。常行秋冬之令。主肅殺收藏。人身中陽氣升浮。穀氣上行。則陽生陰長。春夏是也。既病則周身氣血皆不生。穀氣不升。前雖屬熱。下焦久脫。已化爲寒。久沉久降。寒濕大勝。當急救之。瀉寒以熱。除濕以燥。大升大舉。以助生長。補養氣血。不致偏枯。聖人立治法云。濕氣大勝。以所勝助之。用風木上升是也。經云。風勝濕。是以所勝平之。當和調胃氣而滋元氣。如不止。用風藥以勝濕。此之謂也。

血崩服寒藥變寒用熱治法

薛立齋曰。有婦人患崩。過服寒藥。脾胃久虛。中病未已。寒病復起。煩渴引飲。粒米不進。昏憤時作。脈洪大。按之微弱。此無根之火。內虛寒而外假熱也。十全大補加附子。崩減。日服八味丸愈。又有久患崩。服四物涼血劑。或作或止。有主降火如腹痛。手足俱冷。此脾胃虛寒所致。先用附子理中湯。次用濟生歸脾補中益氣二湯。崩頓愈。若泥痛無補法。則誤矣。

慎齋按。已上三條。序血崩之屬虛寒爲病也。血崩屬火熱致病者多。崩中日久。則熱變爲寒。亦有服寒涼過甚。中寒內生者。東垣立齋之案治。不可不留意也。崩漏有實有虛有熱有寒。寒熱虛實之辨明。而治法可以不忒矣。

崩漏有五色之分

王叔和曰。五崩何等類。師曰。白崩者。形如涕。赤崩者。形如絳。黃崩者。形如爛瓜。青崩者。形如藍色。黑崩者。形如衄血。

崩有陰陽以五色分五臟屬虛冷所致

齊仲甫曰。受熱而色赤者。謂之陽崩。受冷而色白者。謂之陰崩。五臟皆虛。五色隨

崩俱下。一臟虛。隨臟見色而下。其色白如涕。知肺臟之虛冷也。其色青如藍。知肝臟之虛冷也。其色黃如爛瓜。知脾臟之虛冷也。其色赤如絳。知心臟之虛冷也。其色黑形如肝血。知腎臟之虛冷也。五臟俱虛。五色相雜。謂之五崩。

崩漏有陰證陽證之分

龔雲林曰。崩漏之證。有陰陽。若婦人年五十後。經止數年。忽然又行。兼腹痛。或身熱口渴者。曰崩。此陰證也。若婦人年三十四十後。經行三十日。湧暴不止者。曰漏。此陽證也。

慎齋按。已上二條。序崩漏有陰陽五色五臟之見證也。

血崩心痛名殺血心痛

陳良甫曰。婦人血崩心痛。名曰殺血心痛。由心脾血虛也。若小產去血過多而心痛者。亦虛也。用烏賊骨炒末。醋湯下。失笑散。

血崩心痛屬血虛心無所養

薛立齋曰。血崩兼心痛者。心主血。去血過多。心無所養。以致作痛。十全湯。倍參朮多服。如瘀血不行者。失笑散。陰血耗散者。烏賊丸收斂之。

慎齋按。已上二條。序血崩有兼心痛之證也。

治崩漏先調其氣

許叔微曰。治下血不止。成五色崩漏。香附是婦人仙藥。醋炒爲末。久服爲佳。又曰。女人以氣血爲主。不知因氣不先理。然後血脈不順。卽生崩帶諸證。抑氣散。異香四神散。大有奧理。

慎齋按。香附味辛氣溫。能行十二經八脈。爲血中耗氣之藥。婦人虛寒。氣鬱不舒。用之固宜。若陰虛血熱。有口乾燥渴。骨蒸。五心煩熱等證。而必謂婦人之仙藥以用之。未免抱薪救火矣。慎之。

崩與漏有分證治法

李太素曰。崩爲急證。漏爲緩病。崩必是大怒傷肝。衝動血海。或火盛之極。血熱沸騰。而然。漏則房勞過度。傷損衝任二脈。氣虛不能約制經血。或其人平素多火。血不能安。故不時漏泄。崩宜理氣降火升提。漏宜滋陰養氣養血。或兼制火。

治血崩有初中末之三法

方約之曰。血屬陰。靜則循經榮內。動則錯經妄行。故七情過極。則五志亢甚。經血

暴下。久而不止。謂之崩中。治法初用止血。以塞其流。中用清熱涼血。以澄其源。末用補血。以復其舊。若止塞其流。不澄其源。則滔天之勢不能遏。若止澄其源。而不復其舊。則孤陽之浮無以止。不可不審也。

慎齋按。治崩之法。有消逐汚血。有寒涼降火。有收澀固脫。有大升大舉。有扶脾健胃。有補氣補血。有溫暖下焦。種種不一。方氏三法。分初中末。有倒行逆施之弊。予謂中法當爲初法。初法當爲末法。末法當爲中法。庶無差治也。

治崩漏宜調脾胃爲主

薛立齋曰。人以脾胃爲本。納五穀。化精微。清者入榮。濁者入衛。陰陽得此。是謂橐籥。人得土以養百骸。失土則枯四肢。東垣以飲食自傷。醫多妄下。清氣下陷。濁氣不降。乃生腹脹。所以胃脘之陽不能升舉。其氣陷入中焦。當用補中湯。使濁氣得降。不治自安。若因飽食後致崩漏。是傷脾氣下陷於腎。與相火相合。濕熱下迫所致。宜甘溫之劑。調補脾胃。則血自歸經。若誤用寒涼。損傷胃氣。則不能攝血歸經。東垣曰。凡下血證。須用四君子湯收功。厥有旨哉。此皆從脾胃本源病治。不可不知也。

慎齋按。已上四條。序治崩漏之大略也。

婦人血崩服四物湯問

王海藏曰。婦人月事不至。是爲胞閉。爲血不足。宜服四物湯。婦人崩者。是爲血有餘。亦服四物湯。何也。曰。婦人月事不至者。內損其原。不能生血。故胞閉不通。是血不足。宜服四物湯。是益原和血之藥也。崩中者。是血多也。暴損其原。是火逼妄行。涸竭爲根。亦宜四物湯。乃潤燥益原之藥也。

崩漏屬虛熱用藥之法

朱丹溪曰。崩漏有虛有熱。虛則下溜。熱則宣通。氣虛血虛。皆以四物加參耆。因勞力者。加升麻。熱加黃芩。寒加乾薑。又曰。漏下乃熱而虛。四物加黃連。崩過多者。先用五靈一服。紫色成塊者。血熱也。四物加柴胡黃連。後用四物加黑薑。急則治標。用白芷湯下百草霜。

崩漏分諸證用藥之法

薛立齋曰。經云。陰虛陽搏。謂之崩。又云。陽絡傷。血外溢。陰絡傷。血內溢。又云。脾統血。肝藏血。其爲患。因脾胃虛損。不能攝血歸經。或因肝經有火。血得熱而下行。或

因肝經有風。血得風而妄行。或因怒動肝火。血熱沸騰。或因脾經鬱熱。血不歸經。或因悲哀太過。胞絡傷而下崩。治療之法。脾胃虛弱者。六君子加芎歸柴胡。脾胃虛陷者。補中湯加白芍山梔。肝經血熱者。四物湯加柴胡山梔蒼朮。肝經風熱者。加味逍遙散。或小柴胡加山梔白芍丹皮。若怒動肝火。亦用前藥。脾經鬱火者。歸脾湯加山梔柴胡丹皮。悲傷胞絡者。四君子加升柴山梔。故丹溪東垣云。凡下血證。須四君子收功。斯言厥有旨也。若大去血後。母以脈診。急用獨參湯。其發熱潮熱。咳嗽脈數。乃元氣虛弱。假熱之脈也。尤當用人參。此等證無不由脾胃先損。故脈洪大。察其中有胃氣受補則可救。設用寒涼。復傷脾胃生氣。反不能攝血歸源。是速其危也。

血崩用藥有三治

醫壘元戎曰。女子經病血崩。久而成枯者。宜澀之。益之。血閉久而成竭者。宜益之。破之。破血有三治。始則四物入紅花。調黃耆肉桂。次則四物入紅花。調鰾鯉甲桃仁桂。童便和酒煎服。末則四物入紅花。調易老沒藥散。慎齋按。已上四條。序治血崩用藥之大法也。

血熱崩漏用荊芥四物湯論

武叔卿曰。血藏於肝。肝氣不升。則熱迫於下。故血不能藏而崩也。況厥陰之經環陰器。廷孔前陰皆屬之。荊芥升肝氣。香附理肝氣。條芩除內熱。四物養血涼血。故能收功也。

血熱崩漏用河間生地黃散論

武叔卿曰。河間生地黃散。治經漏不止。脈虛洪。經水紫黑。夫脈虛洪者。氣不足也。紫黑者。熱之甚也。黃耆所以補氣。氣盛則生火。天冬地骨以清氣中之火。熱地所以生血。血生而不涼。尤慮妄行。故以生地黃連涼心。芍藥甘草緩肝益脾。柴胡升舉。枸杞地黃。又肝腎同歸者也。

熱崩用涼血地黃湯論

武叔卿曰。涼血地黃湯。治婦人血崩不止。腎水陰虛。鎮守胞絡相火。血走而崩。夫陰者。從陽而亟起也。血屬陰。陰不自升。故諸經之血。必隨諸經之氣而後升。若氣有所陷。則熱迫血而內崩矣。故用黃柏以清下焦胞絡之火。心者。火之主也。故以生地黃連治火之原。知母黃芩滋水之母。歸尾破瘀。紅花生血。所謂去故生新也。